

# Basilea fa endament Albert Camus (1913–1960)

**(gsc) Ils 7 da november 1913, pia avant tschien onns, è naschì en Algeria Albert Camus, premi Nobel da litteratura 1957. El ha bullà la vita spiertala franzosa en ils onns quaranta e tschin-quanta dal tschientaner passà, e quai cunzunt cun ses cumbat per la giustia. Ma sia vaira patria era l'Algeria.**

El sie-miava d'ina societad algeriana fundada sin la giustia, in'Algeria nua ch'Arabs, Berbs, Gidieus ed Europeans pudessan viver ensemen. Igl era però memia tard. La Frantscha naziunalista da matg 1945, tschorva d'ina liberaziun cuntanschida grazia als Stadis unids, aveva supprimi ina revolta mazzacrond millis, forsia dieschmillis Algerians, cunzunt en la citad da Sétif; quai ha muntà la fin dal mitus d'in pajais che possia s'integrar en la naziun franzosa. Dus onns suenter la mort da Camus sin ina strada da Burgogna è l'Algeria vegnida independenta; fugida è bunamain tut la populaziun da derivanza europeica e l'entira cuminanza giudaica. Da lez puntg da vista è la vita da Camus stada ina disfatga, en il senn da ses essai filosofic «Le mythe de Sisyphe»: Ins sto adina puspè rudlar sisum il crap che croda puspè giusum. E Camus tuttina: «Il faut imaginer Sisyphe heureux.»

Quai fa endament era l'emprima da las 95 tesas proclamadas ils 31 d'october

1517 da Martin Luther (1483–1546): «Cristus ha vulì che l'entira vita dals umans cartents saja ina penetienza.» En sia laudatio per il Premi Nobel da litteratura 1957 ha l'Academia svedaisa punctuà: «L'essenzial per Camus n'è betg pli da savoir sch'i valia la paina da viver, mabain co ch'ins stoppia viver, cun la part da suffrientscha che quai munta.»

## **Commemoraziun ils 12 da november cun debatta e film**

Martin Meyer, schef dal feuilleton da la «NZZ», resguarda Camus sco in dals principals auturs dal 20avel tschientaner. Annemarie Pieper, anteriura docenta da filosofia a l'Universitad da Basilea, ha dedigà a Camus ina monografia publicgada a Minca da C. H. Beck. Meyer e Pieper vegnan a far part d'ina discussiun al podi davart Camus mardi, ils 12 da november 2013 a las 19.00 a la Chasa litterara da Basilea, Barfüssergasse 3. I suonda in film da Joël Calmettes (Arte France 2013, 54 minutas) davart la recepziun da Camus en il vast mund, t. a. cun Rupert Neudeck, fundatur da Cap Anamur, e Thierry Bregaud, parsura franzos da «Médecin sans frontières». Camus amava «ses» Mar mediterrane; tge schess el oz cun vesair che lez è vegnì il santeri da dieschmillis Africans che fugivan vers l'Europa?